

Միրելի՛ ընթերցող,

Ուղիղ 20 տարի առաջ սեղանիդ հայտնվեց անձանթ մի գիրք, որ ՀՀ գիտությունների ազգային ակադեմիայի նորաստեղծ կառույցի՝ Շիրակի հայագիտական հետազոտությունների կենտրոնի «Գիտական աշխատություններ» հոդվածների ժողովածուի անդրանիկ հատորն էր: Դու նրան կանաչ ճանապարհ ցանկացար:

Գիտական այս հրատարակության ծնունդը Գյումրիում ջերմորեն ողջունեցին նշանավոր հայագետներ Վլադիմիր Բարխուդարյանը, Լևոն Հախվերդյանը, Արամ Քալանթարյանը, Սարգիս Հարությունյանը, Նիկոլայ Հովհաննիսյանը, Մեն Արևշատյանը և ուրիշներ՝ նաև հուսալով, որ ոչմայրաքաղաքային ակադեմիական կառույցի պատվախնդիր ու հաստատակամ երիտասարդ գիտնականների հանրային ջանքերով ժողովածուն շարունակական կլինի՝ դառնալով հիրավի առաջին հայագիտական պարբերականը Շիրակի պատմության մեջ:

Այդպես էլ եղավ. Շիրակի Հայագիտականի յուրաքանչյուր գիտաշխատողի համար այն ավելին է, քան ինչ-որ ժողովածու, այն իր ինքնության մի մասն է, իր հպարտությունը, շատերի համար՝ իրենց գիտական կենսագրության սկիզբն ու ընթացքը: Նրա հատորներում տեղ են գտել Կենտրոնի գիտաշխատողների երեք հարյուրից ավելի հոդվածներ, հրապարակումներ, հաղորդումներ: Այդ հատորներում «հյուրընկալվել են» նաև հանրապետության բազմաթիվ անվանի բանագետներ ու ազգագրագետներ, լեզվաբաններ ու գրականագետներ, պատմաբաններ ու հնագետներ, ակադեմիական և բուհական համակարգերի երիտասարդ գիտական կադրեր, արտերկրի շուրջ հինգ տասնյակ հայ և այլազգի գիտնականներ: Ժողովածուի հաջողվածության գաղտնիքը նաև նրա խմբագրակազմի աշխատանքի մեջ է, որում քիչ չեն հանրապետությունում ճանաչված հայագետները՝ Աշոտ Մեղրոնյան, Լևոն Աբրահամյան, Պավել Ավետիսյան, Լալիկ Խաչատրյան և այլք:

Ժողովածուն եղավ նաև արգասաբեր հարթակ այս բոլոր տարիներին Կենտրոնում իրականացված բուռն հրատարակչական գործունեության համար. նրա հիմքի վրա ձևավորվեց «Շիրակի հնագիտական և պատմագագրական ուսումնասիրություններ» մատենաշարը, և տպագրվեցին նրա՝ ամբողջական ու ավարտուն աշխատանքներ պարունակող առաջին պրակները, շուրջ 3 տասնյակ մենագրություններ, առանձին գրքերով լույս տեսան Կենտրոնի ուժերով Գյումրիում պարբերաբար գումարվող Շիրակի պատմաաշխատության ժառանգությանը նվիրված միջազգային գիտաժողովների նյութերը: Ժողովածուն այսօր հայագետների շրջանում վաստակած հեղինակություն վայելող, որոշակի գեղագիտական սկզբունքներ դավանող ու բարի ավանդույթներ ունեցող հրատարակություն է՝ ընդգրկված ՀՀ ԲՈՀ-ի կողմից ընդունված պարբերական ժողովածուների ցանկում:

Միրելի՛ ընթերցող, այսօր քո սեղանին է ՀՀ գիտությունների ազգային ակադեմիայի իր քսանամյակը բոլորած Շիրակի հայագիտական հետազոտությունների կենտրոնի «Գիտական աշխատություններ» հոդվածների ժողովածուի արդեն քսաներորդ՝ ասել է թե՛ հոբելյանական հատորը: Իբրև արդարադատ բարեկամ ու անկաշառ ընդդիմախոս՝ նորանոր հատորներ մաղթիր ժողովածուին....

*Գլխավոր խմբագիր՝
բան. գիտ. դոկտոր Մերգո ՀԱՅԼՄՆԵՏՅԱՆ*